

## ITAIFA

# Ujenzi nyumba watakaohama Ngorongoro mbioni kukamilika

Na Mwandishi Maalumu

**W**AZIRI Mkuu, Kasim Majaliwa, amesema serikali imetenga Sh. bilioni 1.2 kwa ajili ya awamu ya kwanza ya mradi wa ujenzi wa nyumba za wananchi watakaokubali kwa hiari kuhama katika Mamlaka ya Hifadhi ya Ngorongoro.

Awamu ya kwanza ya utekelezaji wa mradi huo inahusisha nyumba 103 ambazo ziko katika hatua mbalimbali. Ujenzi ulianza Februari 28, mwaka huu na hadi kufikia Machi 12, mwaka huu, ujenzi wake umefikia asilimia 78, nyumba hizo zikijengwa katika Kijiji cha Msomera wilayani Handeni mkoani Tanga.

Waziri Mkuu alibainisha hayo juzi alipozungumza na wananchi katika Kijiji cha Msomera kabla ya kukagua ujenzi wa nyumba hizo ambazo kati yake, 53 zimepauliwa na hatua za umaliziaji zinaen-

delea, nyumba 42 zipo hatua ya boma na nane zipo katika hatua za ujenzi wa msingi.

Alizitaka wizara, taasisi na idara zote za serikali zinazosughulikia uhamaji wa hiari wa wakazi katika eneo hilo la hifadhi kuendelea kushirikiana kwa karibu ili kukamilisha zoezi hilo kwa ufanisi.

Waziri Mkuu alisema wananchi hao waliokubali kuhama kwa hiari na kwamba watapewa nyumba na eneo lenye ukubwa wa ekari tatu kwa ajili ya kuendeleza shughuli zao za ufugaji. Wananchi hao wanahama ili shughuli za uhifadhi ziendelee katika eneo hilo.

"Serikali itahakikisha haki zote za binadamu zinazingatiwa katika zoezi hilo la kuwahamisha kwa hiari wananchi wanaoishi kwenye Hifadhi ya Ngorongoro kwenda katika maeneo mbalimbali watakayoyachagua kikiwamo kijiji hicho cha Msomera, ambapo tayari serikali imeshapima vi-

wanja 2,500 na kutenga eneo la ekari 1,700 kwa ajili ya kilimo na malisho," alisema.

Waziri Mkuu aliwaagiza viongozi wa Mkoa wa Tanga wakutane na viongozi wa kijiji na wananchi wa eneo hilo ili waendeleo kuwaelimisha kuhusu zoezi hilo na umuhimu wake kwa maendeleo yao na taifa.

Naibu Waziri wa Mifugo na Uvuvi, Abdallah Ulega, alisema kuwa eneo hilo wamekusudia liwe shamba darasa la ufugaji wa kisasa wenye tija kiuchumi ili kuwasaidia wafugaji nchini wanufaike zaidi na ufugaji wanaoufanya tofauti na ilivyo sasa, hivyo akawaomba watoe ushirikiano kwa serikali yao.

Naibu Waziri wa Ardhi, Nyumba na Maendeleo ya Makazi, Ridhiwani Kikwete, alitumia fursa hiyo kuwaomba viongozi na wananchi wa Handeni watahakikishe wanasimamia vizuri mipango ya matumizi bora ya ardhi ili kuepusha migogoro ya ardhi.

"Maeneo yaliyotengwa kwa ajili ya shughuli za ufugaji yalindwe na yatumike kama ilivyokusudiwa," Ridhiwani aliagiza. Baadhi ya wakazi wa kijiji cha Msomera walisema wako tayari kuwapokea wakazi wa Ngorongoro watakaokubali kwa hiari kuhama katika kijiji chao, pia walishukuru kwa kuwa ujio wao utakwenda sambamba na uboreshwaji wa miundombinu ya huduma mbalimbali za kijamii kama maji, afya na umeme.

Awali, akitoa taarifa ya utekelezaji wa mradi huo, Mratibu wa Mradi, Profesa Wakuru Magigi, alisema umebuniwa kukidhi mahitaji ya kuwa mji wa kisasa wa wafugaji na huduma zote muhimu za kijamii na za wanyama kama majosho na maeneo ya minada zita-jengwa.

Alisema wananchi watakaohamia katika eneo hilo watakabidhiwa hati za umiliki wa ardhi ambazo zitawasaidia kupata fursa za kifedha.